

PUBLICATION: Cyberita
DATE PUBLISHED: 17 January 2007

Pameran Udara S'pura Berlangsung Bulan Depan

RUANG udara di sekitar kawasan Changi bakal menjadi tumpuan ramai bulan depan sempena Pameran Udara Singapura 2008 yang berlangsung dari 19 hingga 24 Februari.

Tarikan utama pameran tersebut merupakan pertunjukan udara yang diadakan setiap hari selama 90 minit, dengan aksi-aksi penerbangan nekad dan terbang lalu pesawat-pesawat terkini dari serata dunia.

Pameran tersebut, yang dijangka menarik 80,000 pengunjung, akan diadakan di kawasan seluas 30 hektar di Pusat Pameran Changi.

Pengarah Urusan Pameran Udara Singapura, Encik Jimmy Lau, berkata secara keseluruhannya terdapat 42 buah pameran statik sepanjang empat hari itu.

'Pertunjukan udara nekad oleh pasukan Black Knights daripada Angkatan Udara Republik Singapura (RSAF) dan pasukan Roulettes daripada Angkatan Udara Australia akan berlangsung setiap hari selama 90 minit.

'Selain itu, pameran statik pesawat komersial dan jet pejuang juga akan menarik perhatian mereka yang meminati bidang penerbangan,' katanya.

Antara pesawat terbaru yang akan dipamerkan termasuk pesawat gergasi Airbus A380, jet pejuang F15 dan F18 serta jet pejuang Falcon.

Lima persidangan menggabungkan para penggubal dasar, pegawai kanan lapangan terbang dan pengendali pesawat juga akan berlangsung sepanjang enam hari itu.

Pameran Asian Aerospace dua tahun lalu telah berjaya menyumbang sehingga \$50 juta kepada ekonomi negara.

Pihak penganjur yakin sumbangan lebih tinggi itu dapat dicapai menerusi pameran kali ini.